



HAK ISTERI DALAM PERKAHWINAN



HAK ISTERI DALAM PERKAHWINAN HAK-HAK WANITA ISLAM



1. Apakah **HAK ANDA** sebagai seorang isteri?

Seorang isteri itu adalah berhak kepada:

- Nafkah zahir dan batin;
- Kasih sayang dari suami; dan
- Hak untuk mendapatkan keadilan.

2. Apakah yang dimaksudkan dengan **NAFKAH**?

Nafkah zahir ialah perbelanjaan yang wajib dikeluarkan oleh suami terhadap isteri seperti:

- Makan dan minum;
- Pakaian;
- Tempat tinggal;
- Perubatan; dan
- Pembantu rumah sekiranya perlu.

Nafkah batin pula merupakan keperluan seksual yang perlu dipenuhi oleh pasangan suami isteri yang sah.

3. Bilakah nafkah boleh dituntut?

Nafkah boleh dituntut pada bila-bila masa semasa perkahwinan masih berlangsung.

4. Berapakah **KADAR** nafkah?

Kebiasaannya kadar nafkah adalah berdasarkan kepada keperluan, kemampuan dan kedudukan kewangan suami.

5. Bilakah hak nafkah seorang isteri itu **GUGUR**?

Hak nafkah seorang isteri boleh gugur apabila Mahkamah Syariah mengisytiharkannya nusyuz.

6. Apakah yang dimaksudkan dengan **NUSYUZ**?

Nusyuz ialah keengganan isteri untuk menurut kemahuan dan perintah suami seperti menjauhkan diri daripada suami, meninggalkan rumah suami atau enggan berpindah bersama suami tanpa sebab yang sah mengikut Hukum Syara'.

7. Adakah seseorang isteri itu berhak untuk **MENERIMA SEMULA NAFKAH** apabila dia tidak lagi nusyuz?

Ya, seseorang isteri itu adalah berhak untuk menerima nafkahnya sebaik sahaja dia bertaubat dan tidak lagi nusyuz setelah diputuskan oleh Mahkamah Syariah.

8. Bilakah tempoh **PENERIMAAN** nafkah akan tamat?

Tempoh penerimaan nafkah akan tamat apabila:

- Kematian suami atau isteri; dan
- Isteri diisytiharkan nusyuz oleh Mahkamah Syariah.

9. Apakah yang dimaksudkan sebagai **NAFKAH TERTUNGGAK**?

Nafkah tertunggak ialah nafkah yang tidak dibayar atau tidak diberikan oleh suami bermula dari tarikh perkahwinan mereka atau bermula dari tarikh tertentu sepanjang perkahwinan mereka.

10. Bolehkah isteri **MENUNTUT** tunggakan nafkah?

Ya, isteri boleh menuntut tunggakan nafkah di Mahkamah Syariah mengikut peruntukan Undang-Undang Keluarga Islam.

11. Apakah yang dimaksudkan dengan **POLIGAMI**?

Poligami ialah perkahwinan seorang lelaki dengan lebih daripada seorang perempuan dan tidak melebihi 4 orang dalam sesuatu masa sebagai mana yang ditetapkan oleh Hukum Syara'.

12. Apakah **HAK-HAK** isteri yang berpoligami?

Isteri-isteri yang dipoligami adalah berhak untuk mendapat layanan yang adil daripada suami mereka mengikut Hukum Syara' serta ditetapkan Undang-Undang Islam negeri masing-masing.

13. Adakah hak **ISTERI PERTAMA** sama dengan hak isteri-isteri yang lain?

Ya, hak isteri pertama adalah sama dengan hak isteri-isteri yang lain.

14. Apakah yang **BOLEH DILAKUKAN** oleh isteri sekiranya suami berlaku tidak adil?

Sekiranya suami berlaku tidak adil, isteri boleh membuat pengaduan kepada Mahkamah Syariah di bawah Seksyen 129, Enakmen Undang-Undang Keluarga Islam Sabah 2004.



15. Apakah hak isteri apabila **MENGETAHUI** suaminya telah berpoligami tanpa kebenaran Mahkamah?

Seorang isteri boleh membuat pengaduan kepada Mahkamah Syariah di bawah seksyen 124, Enakmen Undang-Undang Keluarga Islam Sabah 2004.

16. Apakah hak isteri yang telah **DITINGGALKAN LANGSUNG** oleh suami?

Seorang isteri yang ditinggalkan langsung oleh suami boleh membuat pengaduan kepada Mahkamah Syariah di bawah Seksyen 127, Enakmen Undang-Undang Keluarga Islam Sabah 2004.



HAK ISTERI DALAM PERKAHWINAN HAK-HAK WANITA BUKAN ISLAM

1. Apakah yang akan terjadi kepada perkahwinan-perkahwinan yang diupacarakan tidak mengikut peruntukan-peruntukan di bawah Akta Membaharui Undang-Undang (Perkahwinan dan Perceraian) 1976?

Perkahwinan yang diupacarakan tidak mengikut peraturan-peraturan di bawah Akta adalah PERKAHWINAN TAK SAH. Selepas tarikh penguatkuasaan Akta Membaharui Undang-Undang (Perkahwinan dan Perceraian) 1976, Akta 164, iaitu, pada 01.03.1982 semua perkahwinan bukan Islam WAJIB didaftarkan di bawah Akta tersebut dan perkahwinan tersebut bersifat monogami.

2. Apakah maksud **PERKAHWINAN MONOGAMI**?

Perkahwinan Monogami bermaksud selepas tarikh kuat kuasa Akta 164, seseorang yang telah berkahwin secara sah di bawah mana-mana undang-undang tidak boleh berkahwin lagi dengan sah dengan seseorang lain semasa perkahwinan ini masih berterusan sama ada di Malaysia atau di mana-mana negara lain.

3. Apakah hukuman yang dikenakan ke atas seseorang yang berkahwin **LEBIH DARIPADA SATU**?

Jika seseorang yang telah berkahwin dengan sah di bawah sesuatu undang-undang, agama, adat atau kelaziman berkahwin lagi dalam masa berterusnya perkahwinan itu dan dalam hayat suami atau isteri, maka ia disifatkan sebagai melakukan kesalahan di bawah seksyen 494 Kanun Keseksaan.

4. Apakah maksud **DEKRI NISI MUTLAK**?

Dekri Nisi Mutlak adalah dokumen perceraian yang dikeluarkan oleh Mahkamah Tinggi bagi pengesahan pembubaran sesuatu perkahwinan yang sah. Mahkamah Tinggi akan mengeluarkan dokumen Dekri Nisi terlebih dahulu dan selepas tiga (3) bulan akan mengeluarkan Dekri Nisi MUTLAK atas permohonan pemohon di mana tertera tarikh pembubaran

perkahwinan berkenaan. Satu salinan ASAL atau salinan yang diakui sah oleh Mahkamah Tinggi berkenaan perlu diserahkan kepada Bahagian Perkahwinan dan Perceraian, Ibu Pejabat JPNM, Putrajaya untuk pengemaskinian rekod dan status perkahwinan.



5. Apakah maksud **BADAN PENDAMAI**?

Badan Pendamai ertinya - sesuatu majlis yang ditubuhkan bagi maksud perdamaian oleh pihak berkuasa yang berkenaan bagi sesuatu agama, puak, kaum, atau persatuan; atau sesuatu Tribunal Perkahwinan di Jabatan Pendaftaran Negara Malaysia di Negeri / Daerah; atau mana-mana badan lain yang diluluskan oleh Menteri melalui pemberitahu dalam Warta.

**HAK ISTERI DALAM PERKAHWINAN
HAK-HAK WANITA ANAK NEGERI**

1. Adakah perkahwinan yang diupacarakan mengikut adat **BOLEH DIDAFTARKAN**?

Ya, perkahwinan adat boleh didaftarkan di bawah Enakmen Mahkamah Anak Negeri 1992 atau Akta Membaharui Undang-Undang (Perkahwinan dan Perceraian) 1976.

2. Apakah **HAD UMUR** perkahwinan di bawah undang-undang adat?

Had umur perkahwinan di bawah adat bergantung kepada kebiasaan yang diamalkan oleh setiap suku kaum di daerah-daerah.

3. Apakah akan terjadi kepada perkahwinan adat sekiranya salah seorang pasangan **MEMELUK AGAMA ISLAM**?


Perkahwinan tersebut tidak akan terubuh dengan sendirinya. Pasangan yang tidak memeluk agama Islam boleh memfailkan tuntutan cerai di Mahkamah Anak Negeri.

4. Apakah yang boleh dilakukan oleh isteri sekiranya suami mengabaikan tanggungjawab memberi **NAFKAH** kepada isteri dan anak-anak?

Isteri tersebut boleh memfailkan tuntutan nafkah di Mahkamah Anak Negeri.

5. Bolehkah isteri menuntut **SOGIT** daripada suami sekiranya suami berlaku **CURANG**?

Ya, isteri boleh menuntut sogit di bawah seksyen 29 Enakmen Mahkamah Anak Negeri 1992 dalam tempoh tidak lebih dari 3 tahun daripada peristiwa tersebut berlaku.





Disediakan Oleh:

Pusat Bantuan Guaman Wanita dengan kerjasama
Jawatankuasa Undang-undang, Majlis Penasihat Wanita Sabah



Diterbitkan Oleh:

Jabatan Hal Ehwal Wanita Sabah
Tingkat 3 & 4, Wisma Wanita, Km. 3.5, Jalan Tuaran,
Beg Berkunci 2082, 88999 Kota Kinabalu, Sabah
Tel.: 088-236110 Faks: 088-236125
Website: www.wanita.sabah.gov.my
<http://www.facebook.com/jhewas>

Sumber Rujukan:

Enakmen Undang-Undang Keluarga Islam Sabah 2004
Akta Memperbaharui Undang-undang (Perkahwinan dan Perceraian) 1976 [Akta 164]
Enakmen Mahkamah Anak Negeri 1992
Jabatan Pendaftaran Negara (JPN)

Perhatian:

*Risalah ini hanya sebagai panduan sahaja. Anda adalah dinasihatkan untuk
mendapatkan nasihat pakar sebelum mengambil tindakan.*

